

Colegio Bon Bini a celebra 132 aña di experencia WAW den enseñansa di Juffrouw Ritha, Juffrouw Elba y Juffrouw Stella



Recientemente, Minister di Enseñansa y Deporte Endy Croes y Prome Minister Evelyn Wever-Croes a ricibi bishita di tres maestra cu ta celebrando hunto un total di 132 aña di experencia WAW den enseñansa di Aruba, esta juffrouw Gregoritha (Ritha) Thode cu a cumpli 46 aña, juffrouw Elba Hirschfeld-Smith cu a cumpli 43 aña y juffrouw Stella Tromp Chan cu a cumpli 43 aña.

Hunto cu ayudo di cabe-sante di Colegio Bon Bini juffrouw Sharissa, a sorpresa e maestranan na Bestuurskantoor. Durante e bishita, e maestranan a conta nan experencia durante tanto aña. Minister Endy Croes y Prome Minister Evelyn Wever-Croes a comparti un momento ameno cu e maestranan y a gradici nan pa nan amor, pasion y dedicacion durante varios aña den enseñansa di Aruba. E juffrouwnan a ricibi un bunita

reconocemento di Gobierno di Aruba. E maestranan a indica cu nan ta hopi contento di por a experencia e innovacion den enseñansa, e cambio di les tradicional pa les digital. Ademas di esaki, a expresa cu nan ta contento cu despues di varios aña por a presencia e introduccion di Papiamento na scol y por a mira e cambio positivo cu esaki ta trece pa e alumnonan durante les. Pa finalisa, Minister Endy Croes ta felicita nan pa e bunita trabou cu nan ta desplega pa nos



muchanan y ta gradici nan pa e desaroyo di enseñansa di contribui grandemente den Aruba den su totalidad.

Aniversario Directornan Felicitacion pa Sr. Hernandez y Sr. Werleman pa nan respectivo 30 y 15 aniversario na cabes di archivo nacional y departamento di finanzas

Dia 1 di september Sr. Raymond Hernandez a cumpli 30 aña como director di Archivo Nacional Aruba y Sr. Derrick Werleman a cumpli 15 aña como director di Departamento di Finanzas. Pa conmemora e momento special aki Minister Maduro di Finansa y Cultura a ricibi e dos directornan pa asina felicita y gradici cada uno pa e trabou haci na bienestar di Aruba.



Sr. Hernandez ta encarga cu e archivanan cu ta e memoria di nos Pais. Sin archivo, por ehempel, ta dificil pa nos tin acceso na informacion di stamboom cu ta contene lasonan familiar ora ta trata di herencia. Den casonan den corte tin biaha tambe ta e informacion den archivo ta locual por duna claridad. Y asina tin mas informacion cu ta importante pa como pais wordo conserva y bon warda. Sin lubida e proyecto Coleccion Aruba riba www.coleccion.aw na unda cu ANA ta hunga un rol importante.



Ta trabounan importante pa conserva nos herencia cultural pa cual Minister Maduro kier gradici Sr. Raymond Hernandez. Sr. Werleman ta na cabes di Departamento di Finanzas cu ta e curason di gobernacion cu ta percura pa e maneho financiero, pagonan, maneho di debe, pero tambe pa representa Aruba den diferente reunionnan cu Hulanda, CAFT, Landspakket, IMF, Compania di Rating, inversionista internacio-



nal, etc. Den tur e trabounan aki Sr. Werleman semper ta presente y bou su liderazgo Departamento di Finanzas ta haci e trabounan necesario pa logra un maneho financiero sostenibel pa Aruba. Minister Maduro ta gradici Sr. Derrick Werleman pa su liderazgo na bienestar di Aruba.

Aruba Bank a amplia e coleccion di Biblioteca Nacional Aruba cu un donacion generoso di buki



Aruba Bank a haci un donacion di un coleccion significativo di buki na Biblioteca Nacional Aruba.

E contribucion aki ta reforsa e compromiso di Aruba Bank pa sostene educacion, y desorayo positivo den nos comunidad. Biblioteca Nacional Aruba ta sirbi como un centro vital di educacion pa tur bishitantenan. Cu e expansion di su coleccion, BNA por sirbi su usuarionan mihor cu e variacion di buki nobo.



E meta principal di e donacion di Aruba Bank ta pa stimula un comunidad bon informa y cu ta rico na cultura y historia. E banco ta masha contento pa sostene e mision di Biblioteca Nacional Aruba pa promove educacion. Cu e donacion di e bukinan aki, Aruba Bank ta spera pa duna mas acceso na conocimiento y stimula un amor pa lesa entre tur miembro di nos comunidad. E iniciativa aki ta refleha e dedicacion di Aruba Bank pa duna bek na e comunidad y sostene institucion local cu ta contribui na e crecimiento cultural y educativo. Aruba Bank ta spera di por mira e impacto positivo cu e donacion aki lo tin riba e bishitantenan di e biblioteca.